



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Munisípiu Lautem

15 Novembru 2017

JSMP kontinua organiza treinamentu ba estudante sira iha Ensino Sekundáriu Fernando Lasama, Luro – Munisípiu Lautem

Iha 10 Outubru 2017, JSMP hala'o treinamentu ba estudante sira iha Eskola Sekundáriu Jerál Fernando Lasama, iha Luro, Distritu Lautem, kona-ba direitu labarik no asesu ba justisa formal.

Treinamentu ne'e partisipa hosi estudante ensinu sekundáriu jerál sira hosi 10.º ano 11.º ano hamutuk nain 30 kompostu hosi feto nain 20 no mane nain 10.

“Treinamentu ne'e ho objetivu atu hasa'e koñesimentu estudante sira nian kona-ba direitu labarik, tipu krime hasoru menór sira no oinsá labarik sira bele asesu ba iha justisa formál no bele sai referénsia hodi proteze no prevene sira hosi kualker krime hasoru sira,” dehan Casimiro dos Santos, Diretór Interino JSMP.

Materia ne'ebé apresenta no diskute durante treinamentu ne'e kobre asuntu sira kona-ba direitu no definisaun direitu labarik, idade menoridade tuir lei aplikável sira, instituisaun relevante sira estadu nian ne'ebé iha obrigasaun atu proteze labarik, tuir lei nasional no internasionál, nomós tipu krime relevante sira ne'ebé akontese hasoru labarik.

Iha oportunidade ne'e JSMP mós aproveita atu introdús artigu relevantes sira iha Kodigu Penál (KP) no Lei Kontra Violénsia Domestika, partikularmente artigu 155 (KP) kona-ba maus tratus ba menór ne'ebé proibi violénsia hasoru labarik inklui violénsia ne'ebé komete hosi inan-aman mesmu ho natureza no motivaun atu eduka labarik sira. Lei la permite no pratika ne'e proibidu tuir enkuadramentu legál Timor-Leste nian.

Sr. Antonio Alves da Costa, Diretór Eskola Sekundáriu Jerál Fernando Lasama de Luro, agradese tebes ba JSMP no konsidera treinamentu ne'e importante duni tanba ida ne'e nu'udar treinamentu ba dala-uluk ba sira nia eskola hafoin hari'i iha tinan kotuk. Sr. Costa konsidera treinamentu ne'e ajuda teb-tebes estudante sira tanba bele koñese provizaun sira ne'ebé garante no proteze sira ninia direitu hanesan labarik, iha familia, sosiedade no obrigasaun estadu nian.

Treinamentu ne'e realiza tanba apoiu finanseiru hosi embaixada Canada, iha Jakarta-Indonézia.

Atu hetan informasaun klean, favor kontaktu:

Casimiro dos Santos
Diretór Interino JSMP
Diresaun e-mail: casimiro@jsmp.tl

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor Leste
PoBox: 275
Telefone: 3323883 | 77295795
www.jsmp.tl
luis@jsmp.minihub.org
Facebook: www.facebook.com/timorleste.jsmp
Twitter: @JSMPtl